

Ursina va cun 67 onns en la terza classa

Far punts tranter las generaziuns

DA LUCAS DEPLAZES / ANR

■ **Ursina Woodtli-Vital, oriunda da Sent, sa participescha ad in project da Pro Senectute Berna. La finamira da quest project è da sustegnair scolastas e scolasts tar l'instrucziun dals uffants. Ursina – che è pensiunada – va duas giadas l'emna en la terza classa da la scolasta Beatrice Künzli ad Ostermundigen sper Berna.** Ella stat a disposiziun da l'entira classa e guida ils uffants indivi-

dualmain, tenor lur basegns. Il pli savens sto ella gidar ils uffants a leger, tar l'inagrain e declerar dumondas davart noss viver, davart l'ambient e la natira. Savens lavura ella en gruppas da dus u trais scolars, magari er en ina stanza separada. Ursina porscha er agid tar las lavurs manualas.

La vita: In dar ed in prender

Ursina – che è stada tgirunza da professiun – ha grond tschaffen da lavurar cun ils uffants. Quels sajan fitg averts, spon-

tans e fitg engraziavels per ses agid. Il vesaveil success ch'ella possia mingamai constatar suenter in temp tar ils singuls scolarets saja ina gronda satisfacziun, quai saja sia paja. Ella dettia insatge als uffants, ma ella retschaivia bler dapli: La vita è in dar ed in prender, ha punctuà Ursina vers l'Agentura da novitads rumanantscha.

La scolasta è leda

Beatrice Künzli è fitg leda da quest

agid. Sia classa – cun 60% uffants eters – na saja betg ina classa da problems. E tuttina è quest agid dad Ursina in sustegn efficaci. Ils uffants pon profitar d'ina instrucziun persunala, d'ina persuna che prenda temp per els. Beatrice Künzli fa attent che divers uffants n'han oz nagin accumpagnament persunal a chasa.

Integraziun empè da separaziun

La pedagogia actuala pretenda d'integrar tut ils scolars en la scola publica e d'evitar classas pitschnas spezialas sco pli baud. Quai munta savens da s'occu-

par individualmain cun ils uffants debels. En la medema classa sajan las differenzas da savida tranter ils uffants savens fitg grondas. Quella situaziun pretenda in sustegn individual en divers roms per pudair ademplir las finamiras fixadas per las singulas classas. Qua porscha Ursina che ha bler temp per ils singuls scolars in grond agid. Il success è remartgabel, conferma Künzli. L'assistenza da glied pensiunada cun l'experientscha da la vita saja ina buna chausa. Ils uffants han acceptà l'agid senza problems. La scolasta ha infurmà tant ils uffants sco ils geniturs.



Ursina Woodtli-Vital cun Jan e Lucy en la terza classa da Beatrice Künzli ad Ostermundigen.

FOTO L. DEPLAZES

Seniors en scola

Dapi tschun onns datti en 12 vischnancas da la regiun da Berna il project «Win3» (trais generaziuns en la stanza da scola: mintgina gudogna) da Pro Senectute. Quest project dat a senioras ed a seniors la pussaivladad da sustegnair persunas d'instrucziun tenor in program elavurà ensemen cun diversas scolast. Senioras e seniors ston s'obligar per almain in onn, els pon dar lur agid sin ils divers levels (scolina fin la 9avla classa). Il pli savens porschan els lur agid en las emprimas classas. Els lavuran voluntariamain tranter duas e quatter uras l'emna. La lavur vegn prestada gratuitamain. A tgi che sto far viadis vegnan cumpensadas las spensas da viadi. Far part dal project pon persunas tranter 55 ed 83 onns. Impurtant per questa incum-

bensa è: plaschair da lavurar cun uffants, pazienza e perseveranza.

En las 12 vischnancas bernaisas èn s'engaschadas 150 persunas per quest project; dus terz èn dunnas ed in terz umens. Sco quai che Erica Stalder da Pro Senectute Berna ha confermà envers l'Agentura da novitads rumanantscha (anr) èn las experientschas fitg positivs er davart da la magistraglia. Ils uffants han plaschair d'avair insatge che ha peda per els. Finamira dal project saja da porscher a senioras ed a seniors ina lavur che fa senn ed als dat satisfacziun. Ina buna pussaivladad da profitar da l'enorm potenzial da glied cun extendidas experientschas professiunalas e da la vita. In tal engaschament è plinavant adattà per far punts tranter las generaziuns.